

# CONVENIO DE COLABORACIÓN ENTRE A AXENCIA GALEGA DE SANGUE, ÓRGANOS E TECIDOS E O COLEXIO OFICIAL DE FARMACÉUTICOS DA PROVINCIA DA CORUÑA PARA A DIFUSIÓN DE INFORMACIÓN E O FOMENTO DA DOAZÓN DE SANGUE, ÓRGANOS E TECIDOS ENTRE A POBOACIÓN DA PROVINCIA DA CORUÑA.

A Coruña, 23 de decembro de 2022

## REUNIDOS

**Dunha parte**, don Julio García Comesaña, conselleiro de Sanidade, presidente do Servizo Galego de Saúde e presidente da Axencia Galega de Sangue, Órganos e Tecidos (en adiante ADOS), de acordo co establecido no artigo 34 da Lei 1/1983, do 22 de febreiro, de normas reguladoras da Xunta e da súa presidencia, de conformidade cos Decretos 136/2019 e 137/2019, do 10 de outubro polos que se establecen as estruturas orgánicas da Consellería de Sanidade e do Servizo Galego de Saúde, respectivamente, así como co Decreto 142/2015, do 17 de setembro, polo que se crea a Axencia Galega de Sangue, Órganos e Tecidos e se aproban os seus estatutos; e de conformidade co establecido na Lei 1/2016, do 18 de xaneiro, de transparencia e bo goberno de Galicia, así como na Lei 40/2015, do 1 de outubro de réxime xurídico do sector público.


**E doutra parte**, dona Sara Catrain González, na súa condición de presidenta do Colexio Oficial de Farmacéuticos da provincia da Coruña (en adiante COFC), con CIF Q1566002J e domicilio social na rúa Riego del Agua, nº 29 – 4º, A Coruña, actuando en nome e representación do dito Colexio.

Ambas partes recoñécense mutuamente capacidade legal para obrigarse e subscribir o presente convenio, e para o efecto,

## EXPOÑEN

**Primeiro.-** No Decreto 142/2015, do 17 de setembro, polo que se crea a Axencia Galega de Sangue, Órganos e Tecidos e se aproban os seus estatutos establécese que ADOS é unha axencia pública autonómica que se encadra dentro das entidades públicas instrumentais reguladas no título III da Lei 16/2010, do 17 de decembro, de organización e funcionamento da Administración xeral e do sector público autonómico de Galicia.

ADOS ten personalidade xurídica propia, patrimonio e tesouraría propios e autonomía na súa xestión, nos termos que precisen as leis e adscribírase á consellería competente en materia de sanidade a través da dirección xeral con competencias en materia de asistencia sanitaria do Servizo Galego de Saúde.



ADOS terá como fin actuar como un instrumento de xestión eficiente para asegurar a doazón voluntaria de sangue, o procesamento, fraccionamento, almacenamento e o abastecemento de compoñentes sanguíneos e hemoderivados, a coordinación de transplantes de órganos e a obtención, procesamento, almacenaxe, distribución e implante de células e tecidos, aplicando os criterios de calidade vixentes no mercado e na lexislación de aplicación, e seguridade marcados tanto pola lexislación vixente como polas guías científicas, e asegurando que se cumpren todos os aspectos éticos inherentes á doazón e ao uso de substancias de orixe humana procedentes dela.

**Segundo.-** Entre as competencias da ADOS figuran as seguintes:

- Conseguir doazóns voluntarias e altruístas de sangue, medula ósea e sangue de cordón umbilical para cubrir as necesidades do sistema sanitario de Galicia.
- Promover a participación activa, no marco da responsabilidade social corporativa, de institucións, organismos e empresas de Galicia, nas políticas de promoción da doazón de sangue, órganos e tecidos.

**Terceiro.-** Como principios de actuación de ADOS destacan os de voluntariedade e altruísmo na doazón de sangue e os seus derivados, órganos e tecidos e de solidariedade e compromiso social das institucións públicas e privadas coa política transfusional e de transplante.

**Cuarto.-** O COFC é unha corporación de dereito público que ten personalidade xurídica propia e plena capacidade de obrar para o cumprimento dos seus fins. O COFC desenvolve a súa actividade de acordo cos seus Estatutos tal como figuran na Orde da Consellería de Presidencia e Administracións Públicas e Xustiza do 1 de setembro de 2008, pola que se aproban os estatutos do Colexio Oficial de Farmacéuticos da provincia da Coruña (DOG nº 175 do 10/09/1998)

**Quinto.-** É fin esencial do COFC a ordenación do exercicio da profesión dentro do marco legal respectivo, a representación dela e a defensa dos intereses profesionais dos colexiados.

Ademais ten como fin colaborar coas administracións públicas no exercicio das súas competencias, nos termos previstos na lexislación vixente.

**Sexto.-** No apartado 2 do artigo 6 dos estatutos do COFC figura entre as súas funcións a de cooperar cos poderes públicos na promoción do dereito á saúde e colaborar coas administracións públicas do seu ámbito territorial, para o cal se poderán subscribir acordos ou convenios no marco da normativa vixente.

**Sétimo.-** Que é vontade destas institucións traballar conxuntamente promovendo accións de difusión de información e o fomento da doazón de sangue, órganos e tecidos entre a poboación da provincia da Coruña.



Polo anteriormente exposto, os asinantes expresan a súa vontade de facilitar e fomentar as máis fluídas relacións a fin de impulsar accións concretas nas áreas de interese común polo que acordan a sinatura do presente convenio, de acordo ás seguintes

## CLÁUSULAS

### Primeira.- Obxecto e finalidade

O obxecto do presente convenio é establecer a forma e condicións da cooperación entre as partes asinantes, para a difusión de información e o fomento da doazón de sangue, órganos e tecidos entre a poboación da provincia da Coruña, co fin de contribuír a garantir a cobertura das necesidades hemoterápicas aos centros sanitarios da Comunidade Autónoma de Galicia e a doazón de órganos e tecidos.

### Segunda.- Compromisos que asume o COFC

O COFC pon a disposición da ADOS a posibilidade de difundir a través das oficinas de farmacia da provincia da Coruña e das canles de comunicación de que dispón (tanto dixitais coma en soportes físicos), a información sobre as actividades da ADOS relacionadas co obxecto deste convenio. Estas actividades de difusión de información e fomento, serán realizadas con suxeición á dispoñibilidade e criterio de cada titular de oficina de farmacia.


### Terceira.- Compromisos que asume a Axencia Galega de Sangue, Órganos e Tecidos

A Axencia Galega de Sangue, Órganos e Tecidos de Galicia colaborará co COFC compartindo material promocional do que dispón para a realización de tarefas de divulgación e información. Da información queda excluída aquela que teña a consideración de persoal ou especialmente protexida.

### Cuarta.- Publicidade das accións conxuntas

Cando as actividades conxuntas leven consigo a elaboración de publicacións, estudos, proxectos ou materiais divulgativos ou informativos, estes levarán inserido o logotipo ou distintivo das partes asinantes, farán mención á colaboración desenvolvida, e ambas partes poderán utilizalos nos seus respectivos ámbitos de actividade.

En calquera actividade promovida ou realizada polas partes ao abeiro do presente acordo ou contemplada en acordos específicos, farase constar que a mesma é froito da colaboración establecida entre as mesmas.



## Quinta.- Financiamento

A sinatura do presente convenio non supón compromiso económico algún para as institucións asinantes e por iso non se precisa consignación orzamentaria.

## Sexta.- Comisión mixta de seguimento do convenio

Para a realización e control de aquelas accións que, con motivo do presente convenio, sexan levadas a cabo, constituirase unha Comisión Mixta de Seguimento, coa finalidade de resolver as dúbidas que se produzan na súa interpretación e aplicación.

Esta comisión estará composta polo menos por dous representantes designados por ADOS e outros dous representantes designados polo COFC.

Por parte de ADOS:

- A persoa titular da dirección de xestión e servizos xerais que actuará como presidente
- A persoa titular da xefatura da área de sangue, compoñentes sanguíneos e hemoderivados

Por parte do COFC:

- A persoa titular da Vicepresidencia do COFC
- A persoa titular da Secretaría do COFC

A Comisión Mixta de Seguimento terá as seguintes competencias:

1. Establecer as actividades obxecto do convenio.
2. Organizar os medios necesarios para as ditas actividades.
3. Garantir o desenvolvemento normal dos compromisos asumidos.
4. Coordinar as accións e articular instrumentos de mellora e fórmulas de incremento da eficacia.
5. Propoñer addendas ou modificacións a este convenio para que sexan aprobadas polos órganos competentes.
6. Tratar de resolver as cuestións de diverxencia que poidan xurdir no desenvolvemento do convenio.

A Comisión Mixta de Seguimento reunirse cando o solicite calquera das dúas partes.

Os acordos da comisión adoptaranse por maioría dos seus membros, tendo o seu presidente voto de calidade.



### Sétima.- Causas de resolución do convenio

Son causas de resolución do convenio:

- a) O transcurso do prazo de vixencia do convenio sen acordarse prórroga do mesmo.
- b) O acordo unánime dos/as asinantes.
- c) O incumprimento das obrigas e compromisos asumidos por parte de algún dos/as asinantes.
- d) Por decisión xudicial declaratoria de nulidade do convenio.
- e) Por calquera outra causa distinta das anteriores previstas en outras leis.

### Oitava.- Resolución de conflitos

As partes asinantes do presente convenio comprométese a resolver de maneira amigable calquera desacordo que poida xurdir no seu desenvolvemento. De non chegarse a acordo, as cuestións obxecto de diverxencia serán tratadas na Comisión Mixta de Seguimento e, de persistir, serán elevadas ao Conselleiro de Sanidade, cuxa resolución porá fin á vía administrativa e poderá ser impugnada ante a xurisdición contencioso-administrativa.

### Novena.- Protección de datos

De conformidade co establecido no Regulamento (UE) 2016/679 do Parlamento Europeo do Consello de 27 de abril de 2016 relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE así como na Lei Orgánica 3/2018, de 5 de decembro de Protección de Datos Persoais e Garantía dos Dereitos Dixitais, ambas partes comprométese a gardar a máis estrita confidencialidade respecto de calquera das informacións, datos e documentación de carácter persoal á que teñan acceso en virtude do presente convenio e ao deber de gardalos, sen que poidan ser utilizados para usos diferentes aos previstos no mesmo, facendo constar de maneira expresa que velarán polo cumprimento da normativa de protección de datos persoais de aplicación en cada caso. Estas obrigacións subsistirán incluso despois de concluídas as relacións negociais entre as partes.

### Décima.- Vixencia, prórroga e modificación do convenio

1. A duración do presente convenio será de catro anos contados desde o día da súa firma, salvo denuncia expresa dunha das partes asinantes, formulada cunha antelación mínima de dous meses:

2. O convenio poderá ser modificado a proposta da Comisión Mixta de Seguimento do Convenio e previo acordo das partes.



3. En calquera momento, antes da finalización do prazo de vixencia dos convenio, as partes poderán acordar a súa prórroga por un período de ata catro anos adicionais

Así mesmo as partes poderán acordar, de mutuo acordo, a extinción do convenio.

#### **Décimo primeira.- Natureza xurídica do convenio**

O presente convenio ten natureza administrativa e rexerese pola Lei 40/2015, do 1 de outubro, de réxime xurídico do sector público e pola lexislación sobre a materia obxecto do mesmo.



De conformidade co disposto no artigo 6 da Lei 9/2017, do 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, o presente convenio está excluído do ámbito de aplicación desta lei. Non obstante de conformidade co previsto no artigo 4 da dita lei aplicaranse os principios desta para resolver as dúbidas e lagoas que puideran presentarse.

#### **Décimo segunda.- Rexistro de convenios, transparencia e bo goberno.**

A sinatura deste convenio leva implícito o consentimento expreso das persoas intervinientes para que a Administración pública autonómica galega poida facer públicos os datos de carácter persoal e demais especificacións que figuren nel, de acordo co disposto na Lei 19/2013 do 9 de decembro, de transparencia, acceso á información pública e bo goberno e a Lei galega 1/2016, do 18 de xaneiro, de transparencia e bo goberno.

O presente convenio será obxecto de inscrición no Rexistro de Convenios da Xunta de Galicia, nos termos previstos no Decreto 126/2006, do 20 de xuño, polo que se regula o Rexistro de Convenios da Xunta de Galicia

E en proba de conformidade asínase por duplicado o presente convenio no lugar e data anteriormente indicado

<p>O conselleiro de Sanidade e presidente da Axencia Galega de Sangue, Órganos e Tecidos</p>  <p>Julio García Comesaña</p>	<p>O presidenta do Colexio Oficial de Farmacéuticos da provincia da Coruña</p>  <p>Sara Catrain González</p>
---	---